

Broj: 09-11-4-756-¹⁷26
Sarajevo, 02-07-2026

Na osnovu člana 69. stav (3) Zakona o javnim nabavkama („Službeni glasnik BiH“, broj 39/14, 59/22 i 50/24), člana 30. Pravilnika o unutrašnjoj organizaciji Federalnog ministarstva raseljenih osoba i izbjeglica, broj: 07-02-73-16/25 od 20.03.2025. godine, a u vezi sa provedenim otvorenim postupkom javne nabavke usluga – Organizovanje programa obuke mladih u povratničkim sredinama iz oblasti IT i digitalizacije, federalni ministar raseljenih osoba i izbjeglica, *d o n o s i*

ODLUKU O OTKAZIVANJU POSTUPKA JAVNE NABAVKE

I

Otkazuje se postupak javne nabavke usluga „Organizovanje programa obuke mladih u povratničkim sredinama iz oblasti IT i digitalizacije“, pokrenut na osnovu Odluke o pokretanju postupka, broj: 09-11-04-756/26 od 06.04.2026. godine, broj obavještenja o nabavci 668-1-2-27-3-36/26, a čiji je sažetak objavljen u „Službenom glasniku Bosne i Hercegovine“, broj 26/26 u skladu sa članom 69. stav (3) Zakona o javnim nabavkama („Službeni glasnik BiH“, broj 39/14, 59/22 i 50/24).

II

Stavlja se van snage Odluka, broj: 09-11-4-756-13/26 od 18.05.2026. godine kojom je za realizaciju predmetne nabavke izabran ponuđač „CTECH“ d.o.o. Sarajevo sa ponuđenom cijenom od 200.000,00 KM bez PDV-a.

III

Ova odluka stupa na snagu danom donošenja i bit će objavljena na internet stranici Federalnog ministarstva raseljenih osoba i izbjeglica, u skladu sa članom 70 stav (6) Zakona o javnim nabavkama („Službeni glasnik BiH“, broj 39/14, 59/22 i 50/24).

Obrazloženje

Federalno ministarstvo raseljenih osoba i izbjeglica provelo je otvoreni postupak javne nabavke usluga – „Organizovanje programa obuke mladih u povratničkim sredinama iz oblasti IT i digitalizacije“, planiran Planom javnih nabavki za 2026. godinu, dio II – Usluge, redni broj 2, pokrenut na osnovu Odluke o pokretanju postupka broj: 09-11-4-756/26 od 06.04.2026. godine. Procijenjena vrijednost nabavke iznosila je 200.000,00 KM bez PDV-a. Kriterij za dodjelu ugovora bio je „najniža cijena“, u skladu sa članom 64. Zakona o javnim nabavkama („Službeni glasnik BiH“, broj 39/14, 59/22 i 50/24). Obavještenje o nabavci, broj: 668-1-2-27-3-36/26 od 08.04.2026. godine, objavljeno u Službenom glasniku BiH - Oglasnik javne nabavke, broj: 26/26.

Prije pokretanja predmetnog postupka javne nabavke, ugovorni organ je, u skladu sa članom 14a. Zakona o javnim nabavkama („Službeni glasnik BiH“, broj 39/14, 59/22 i 50/24), proveo prethodnu provjeru tržišta radi pripreme nabavke i planiranja realizacije projekta. O provedenoj prethodnoj provjeri tržišta sačinjena je službena zabilješka od 16.02.2026. godine, koja je uložena u predmet spisa, čime je ugovorni organ postupio u skladu sa zakonskom obavezom i na osnovu raspoloživih podataka izvršio planiranje predmetne javne nabavke.

Nakon provedenog otvorenog postupka javne nabavke izvršen je pregled i ocjena pristiglih ponuda, pri čemu je utvrđeno da je ponudu dostavio jedan ponuđač – CTECH d.o.o. Sarajevo, čija je ponuda ocijenjena prihvatljivom i u skladu sa uslovima iz tenderske dokumentacije. Odlukom ugovornog organa, broj: 09-11-4-756-13/26 od 18.05.2026. godine, za realizaciju predmetne nabavke izabrano je privredno društvo CTECH d.o.o. Sarajevo.

Cilj realizacije projekta „Kursevi za srednjoškolce: Programiranje i Digitalni marketing“ bio je unapređenje digitalnih kompetencija mladih iz povratničkih sredina, njihovo osposobljavanje za tržište rada, poticanje interesovanja za savremene tehnologije i inovativno razmišljanje, pružanje ravnopravnih obrazovnih prilika učenicima iz povratničkih sredina, kao i jačanje veza između formalnog obrazovanja i potreba tržišta rada. U okviru projekta bilo je planirano organizovanje dva različita kursa iz oblasti informacionih tehnologija i digitalnog marketinga na osam lokacija na području Bosne i Hercegovine, uz procijenjeni broj od 250 do 300 polaznika, te donacija odgovarajuće opreme kao dodatni poticaj obrazovanju. Mjesta održavanja obuka određena su na osnovu podataka kojima raspolaže

Ministarstvo, uključujući podatke iz javnih poziva koje provodi Ministarstvo, prema kojima navedenim lokacijama gravitira oko 1.000 srednjoškolaca iz povratničke populacije. Na osnovu tih pokazatelja procijenjeno je da postoje realni uslovi za ostvarivanje planiranog broja polaznika.

U skladu sa planiranim aktivnostima na realizaciji projekta, Ministarstvo je dana 27.04.2026. godine na službenoj web stranici objavilo obavještenje kojim je predstavljen projekat, njegovi ciljevi i plan realizacije, te je upućen poziv srednjoškolcima iz povratničke populacije da se elektronskim putem prijave za pohađanje jednog od planiranih kurseva. Pored objave na službenoj web stranici, Ministarstvo je pozive za prijavu dostavilo osnovnim i srednjim školama sa kojima je ostvarena saradnja u vezi sa realizacijom projekta, kako bi škole putem nastavnika i svojih komunikacijskih kanala informisale učenike o mogućnosti pohađanja obuka.

Međutim, uprkos poduzetim aktivnostima promocije projekta i informisanja ciljane grupe, u periodu od 27.04. do 08.06.2026. godine elektronskim putem prijavilo se ukupno 30 kandidata. Navedeni broj prijavljenih višestruko je manji od planiranog broja korisnika na osnovu kojeg je izvršeno planiranje projekta, osiguranje budžetskih sredstava i provođenje predmetnog postupka javne nabavke. Analizom zaprimljenih prijava utvrđeno je da ne postoji dovoljan interes ciljane populacije za realizaciju planiranih aktivnosti u obimu predviđenom tenderskom dokumentacijom i odabranim modelom izvođenja obuke. Realizacijom ugovora pod takvim okolnostima ne bi se ostvarili ciljevi zbog kojih je predmetna nabavka pokrenuta, niti bi se mogla osigurati efikasna, ekonomična i svrsishodna upotreba javnih sredstava.

Ugovorni organ smatra da bi zaključivanje i realizacija ugovora sa izabranim ponuđačem u punom ugovorenom iznosu, za program koji bi pohađalo svega 30 prijavljenih kandidata umjesto planiranih 250 do 300 korisnika, predstavljala neracionalno i neopravdano trošenje budžetskih sredstava. Također, realizacija ugovora pod ovakvim okolnostima ne bi proizvela očekivane rezultate projekta niti bi opravdala svrhu zbog koje je postupak javne nabavke pokrenut.

Nakon donošenja odluke o izboru najpovoljnijeg ponuđača nastupile su okolnosti koje ugovorni organ nije mogao sa sigurnošću predvidjeti u vrijeme planiranja i provođenja postupka javne nabavke, a koje su od odlučujućeg značaja za realizaciju predmetnog ugovora. Tek nakon objavljivanja javnog poziva i provođenja procesa prijavljivanja korisnika bilo je moguće utvrditi stvarni stepen zainteresovanosti ciljane populacije, koji je značajno odstupio od projektovanih potreba i planiranog obuhvata korisnika.

Imajući u vidu da je osnovni cilj predmetne nabavke bio organizovanje obuka za znatno veći broj mladih osoba iz povratničkih sredina, te da zbog izrazito malog broja prijavljenih kandidata više ne postoji stvarna potreba za realizacijom ugovora u obimu i vrijednosti predviđenoj predmetnim postupkom javne nabavke, ugovorni organ je ocijenio da su u konkretnom slučaju ispunjeni uslovi iz člana 69. stav (3) Zakona o javnim nabavkama („Službeni glasnik BiH“, broj 39/14, 59/22 i 50/24) kojim je propisano: „Ugovorno tijelo može otkazati postupak javne nabavke samo zbog dokazivih razloga koji su van kontrole ugovornog organa i koji se nisu mogli predvidjeti u vrijeme pokretanja postupka javne nabavke.“

Na osnovu svega navedenog odlučeno je kao u dispozitivu ove odluke.

Pouka o pravnom lijeku

U skladu sa članom 101. stav (1) tačka d) Zakona o javnim nabavkama („Službeni glasnik BiH“, br. 39/14, 59/22 i 50/24) protiv ove Odluke ponuđač može izjaviti žalbu u roku od 10 (deset) dana od dana prijema iste. Žalba se izjavljuje Uredu za razmatranje žalbi Bosne i Hercegovine, putem Ugovornog organa Federalnog ministarstva raseljenih osoba i izbjeglica u pisanoj formi direktno ili preporučenom poštanskom pošiljkom na adresu ugovornog organa. Žalba se podnosi u najmanje 3 (tri) primjerka.

Dostaviti:

1. Ponuđaču u postupku
2. Komisiji za javne nabavke
3. Sektoru za razvojne projekte održivosti povratka
4. Službi za pravne, personalne i poslove javnih nabavki
5. Arhiva

